



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tiryimyim@aolima



tir yimyim

TAPAK 8

**Tshering Tobgay tanaben
Bhutan ato kilonser akumtsü**

**ICC Test Player Rankings: Bumrah
4bubai tuogo**



VOL. XXI NO. 88 (ADOK 88) DIMAPUR

YANGTEPNÜ (THURSDAY)

ANJETI (JANUARY) 11, 2024

₹ 5.00

DG Assam Rifles-i Moreh semdang

Imphal, January 10, 2024 (Agencies): Director General Assam Rifles Lt Gen PC Nair-i January 10, 2024 nü Moreh semdangogo.

Moreh nung tensa mejungi akumba aser sepaitem amakba sülen pai Moreh semdang.

Iba mapang Sect Cdr Brig V P Yadav-i DGAR Gen Nair dang tensa osang lemsatop aser pai Civil Society organizations züngsemtem den ajurutepa senden ka amen.

Hill Tribe Council, Kuki Students Organization, Kuki Women Union, Human Rights Moreh, Kuki Inpi Tegnoupal, Tamil Sangam, Gorkha Samaj Samiti aser Manipur Muslims Council lennirtemi Gen Nair den senden amen.

Moreh jila ya Manipur nung Indo-Myanmar arrtsülen anasa

lir aser December 2023 tatemlen nungi tensa mejungi akum.

Moreh ya Manipur nung tanga jilatam dang nungi khenyongi balaka lir kechiyong iba jila nung nisung temeyoktep lir. Iba jila nung kum aika Kuki, Meitei, Naga, Tamil, Pangal, Gorkha, Sikh aser tanga kintem külemi liyonga arur, ta Gen Nair-i ashi.

"Küm ana tashi COVID-19 wara ajuruba ajanga tanur aser lanurtem takum nung kanga kongshiogo. Tarutsü tia kanga majung lir anungji asenoki ozung alema inyaksangshiba anentsüla" ta DGAR-isa ashi.

"Moreh nung alirtem khuret balala asoshi mapa inyaksü saka iba jila nung alirtem aser Talisa tetsürtemi yimjung bener arutsü atema shilem agitsüla" ta paisa ashi.

'Naga Magna Carta Day' nung Naga Club-i Imkongmeren Ao tushi



Longkhum yimtsüng nung Naga Club-i NNC Tatong Tir Imkongmeren Ao nem tetushi agütsüba mapang agiba noksa ka angur.

Dimapur, January 10, 2024 (TYO): January 10 nü Mokokchung district kübok Longkhum yimtsüng nung "Naga Magna Carta Day" nung Naga Club-i NNC tatong tir Imkongmeren Ao nem tetushi agütsüogo.

"Naga Club tenung nung ni nenok ajak pelashishia agizüker aser Naga Magna Carta Day amongdak nenok adenba atema tenungsang agütsür" ta Naga Club Tir Kuolachalie Seyie-i o jembidang ashi.

"Naga Club-i Naga loktiliba atema tim mapa inyaksü ta ni amanger. Iba anogomong nung tesüiba meyipa repringshir, tanü tendak ochishia aser jungjunga asadanger aser ajemlawa asen nübortem atema tebilemba aser mangdang ayur" ta pai ashi.

Naga Club Tir Seyie-isa Naga National Council (NNC) tatong

tir Imkongmeren Ao nem akhüm tetushi agütsü.

ImkongmerenAo-i mangdang tulu ayuba nung Naga nunger jayayonga arur, ta pai ashi.

"Imkongmeren-i Naga nunger putiotsü kanga junga meteta pa teinyaksü mapatem inyakogo. Tanü onok Longkhum-i arur Naga nunger ajaki meimba aser akhümsübuba asen lennir nem tetushi agütsür. Pai Naga yimten jenjang atema akangkanga noktak aser Naga lima kanga meim. Pa takum atema benjunger aser pai lanu pututem atema bendanga agütsüba bilemteter" ta Seyie-isa ashi.

Paisa Ao region nung aliba Ao yimtsüng ajak dang pelaba metetdaksü. "Naga nunger nüjiso atema inyaka aruba nung nenoki Naga Movement otsü takum lidaksüogo" ta Seyie-i ashi.

"Mangdang aliba asen oboula nungeri January 10, 1929 nü British Statutory Commission nem otsüsütsü aketba memorandum agütsü. Iba nung "aleml nungi lia aruba ama onok nem onok tarutsü yangludakjang" ta zülur agütsür aser iba ya Naga National Politics nung mezüngbuba Magna Carta liasü. Iba ajanga Naga nunger temeten tamendakdak yanger aser asenok sasa liyonga aotsü temeten angu" ta Naga Club Tirisa metetdaksü.

Kümshia January 10 ya asenok ajak atema Red-Letter Day ka lir aser iba anogo asenoki Naga National pioneers aser Imkongmeren Ao ama asen lennirtem bilemteter, ta paisa ashi.

Moyaluin aser Sakulemla na jabaso Imkongmeren Ao ya 1900 kum aso aser January 16, 1979 kum alima nungi pila.

Y Patton-i Indo-Myanmar arrtsü atsidangtsüba ashishiteper

Aizawl, January 10, 2024 (Agencies): Nagaland deputy chief minister Y Patton-i Mizoram Chief Minister Lalduhoma den ajurutepdang tawa state assembly election nung takok anguba aser northeast dak sendakba onüktem lemsatop.

Assembly Election nung takok tulu anguba atema Y Patton-i Lalduhoma nem tenungsang agütsü.

Naga aser Mizo nunger tsungda aleml nungi aser sobaliba tsütsü tesentaktep lir ta paisa ashi.

Mizo nunger ama Myanmar nung akhidang nungi Naga nunger aika lia arur ta Y Patton-isa Naga aser Mizo nunger medemdangba olen ka ashi.

Indo-Myanmar arrtsü atsidangtsüba ya Naga nungeri

magizüker ta Patton-isa Centre sorkari Free Movement Regime (FMR) agientsü sentong renema atema ashi.

January 4 nü Lalduhoma-i New Delhi nung Home Minister Amit Shah den ajurutepdang Myanmar den arrtsü atsidangba aser FMR agientsüba magizüker ta metetdaksüogo.

Mizo nungeri Myanmar nung Chin nunger den azü agi sentaktepa lir anungji item maparen magizüker ta Lalduhoma-i ashi.

India-i Myanmar den kilometre 1,643 agi arrtsütepa lir. Mizoram-i kilometre 510, Manipur-i kilometre 398, Nagaland-i kilometre 215 aser Arunachal Pradesh-i kilometre 520 agi arrtsütepa lir.

ST list nungi Kuki-Zo nunger agientsü mapa aitsür: ITLF

Imphal, January 10, 2024 (Agencies): Centre aser Manipur sorkartemi Scheduled Tribes (ST) list nungi Kuki-Zo-Chin nunger agientsü sentong atongba aitsür ta Indigenous Tribal Leaders' Forum (ITLF)-i metetdaksüogo.

ST list nungi Kuki-Zo-Chin nunger agientsüba ya Manipur sorkar aser Meitei nunger kar asalentong lir ta ITLF-i ashi.

Manipur sorkari Kuki-Zo lisopurtem ket nungi temetentem aser ali atsünga agitsü atema iba mapa inyaker ta parnokisa ashi.

"Ajisüaka ST list nungi kin ka agientsübaji mapa tezüba masü. Biren Singh'er sorkari Kuki-Zo nunger anema state sorkar ketdangsubaren amshir" ta ITLF-i metetdaksü.

Iba ajanga Manipur aser nübortem nem timtem ang

bentsür arutsü ta parnokisa ashi.

Manipur sorkari Scheduled Tribes (ST) list of India nungi kin ka enoksemtsü mesüra agientsü atema state nung recognized tribes ajak adenba luden ka tentetogo.

Centre-i Manipur nung Scheduled Tribes (ST) list nungi "Nomadic Chin-Kuki" agientsü atema shidi ka züluba asadangtsü atema Manipur sorkar dang ashi.

"Nomadic Chin-Kuki nunger ya ST list of India nung dendaksü saka parnok komaser list nung aden ibaji tanaben meyipa repringshiba sülen ang osang metetdaksütsü" ta Manipur chief minister N Biren Singh-i Mongulbarnü ashi.

"Onoki state nung recognized tribes ajak dena luden ka tentetogo aser iba sülen ang Centre nem osang

sangoktsütettsü" ta paisa ashi.

Manipur nung government-recognized tribes 34 lir.

Republican Party of India (Athawale) national secretary Maheshwar Thounaojam-i ST list nungi "nomadic Chin-Kuki" agientsü shidi ka züluba sülen Union Tribal Affairs Ministry-i Manipur sorkar nemo sang sangoktsü.

December 26, 2023 nü Thounaojam-i Centre sorkar dang Manipur indang ST list nung "Any Mizo (Lushai) tribes", "Zou" aser "Any Kuki tribes" ta enoksema lir aser iba ya magizüker ta shidi ka zülü.

Iba sülen Centre sorkari Manipur sorkar dangi office memorandum ka yokba nung ST list nung bendenloksü mesüra agientsü atema state sorkar nungi arutsüla ta ashi.

IT deduction at source shisatokden ka agi

Dimapur, January 10, 2024 (TYO): January 10, 2024 nü Townhall, Niathu Resort Chumoukedima nung Income Tax-tax deduction at source (IT-TDS) indang shisatokden sentong ka agiogo.

One Day Outreach Seminar ya Nagaland Health Protection Society-i Commissionerate of Income Tax NER, Guwahati den yaritepa ayongzük.

Iba sentong nung Commissioner and Secretary, Health and Family Welfare V Kezo-i tetushi süa jaoker ka ama shilem agi.

Shisatokden sentong nung shisalen sayurtemji Commissioner of Income Tax (TDS) NER C Deepak Singh, Additional Commissioner of Income Tax Range-TDS, Shillong Rintei Renthlei aser Deputy Commissioner of Income Tax Range-TDS, circle Guwahati Mani Sankar Bardoloi nunger liasü.

Iba sentong nung Tax Compliances, PM-JAY CMHIS Scheme, Income Tax Act for Scheduled Tribes kübok onüktem aser IT returns & refunds filing indang onüktem jemi.

Küpza yimtak 39 buba Ongpangkong Kaketshir Mungdang Inti Senden Sentong January 17 nungi 19 tashi amungtsü renemtepdar



Tanu January 10 nü küpza yimtak shisalemsatepa maparen lemsateptsü asoshi OKM ketdangpurtem, OKM Planning Committee, OKM Local Planning Committee, Küpza Kaketshir Telongjem aser Küpza Putu yimsüsürtem telongjem senden ka mener kelen mungdang ki asüba tesem nung külemi tangokba noksa anur.

Mokokchung, January/Aenjeti 10(TYO) : Küpza yimtak 39 buba Ongpangkong Kaketshir Mungdang(OKM) "Nüchiba Shisaluyim" omen nung ajemdaker Inti Senden Sentong January 17 nungi 19 tashi amungtsü sentong renema lir.

Iba mungdang takok ngua agitettsü asoshi tanu January 10 nü küpza yimtak shisalemsatepa maparen lemsateptsü asoshi OKM ketdangpurtem, OKM Planning Committee, OKM Local Planning Committee, Küpza Kaketshir Telongjem aser Küpza Putu yimsüsürtem telongjem senden

ka menogo. 39 buba Ongpangkong Kaketshir Mungdang(OKM) Inti Senden Sentong January 17 Nagaland Legislative Assembly Speaker Wb.Sharingain Longkumer-i mungdang lapoktsütsü aser January 18 Mungdang Yatinü tongti tesemdanger Minister, RD & SIRD Wb.Metsübo Jamir süa pai OKM Mungdang nungo Kaket "Limketer" sayatsütsü aser Advisor Minority Affairs & Sericulture Wb.Imkongmar-i mungdang shibangtsütsü.

Iba mungdang nung "Nüchiba Shisaluyim" omen nung ajemdaker Sao Chang

Govt.College, Tuensang Principal Dr.Lanurenla aser Deputy Labour Commissioner & CEO, NBOWWB Wb.Chubayanger tenati jembitsü.

Mungdang sentong nungsa shisalemsapang sentong tajung akatsü, Ao Kaketshir Mungdang Tir Sb.Lanutoshi Aier aser Central Nagaland Students' Association Tir Sb.R.Sünep Pongen tenati jembiba den Tsükong pungo(5) Kaketshir Telongjem Tir-temi salem o jembitsü. Sentongtem nungsa lokti senden balaka agitsü mendenpur melentepba sentong agitsü.

Wenneyi Konyak-i RC Nagaland House New Delhi mapa bena atatsü

Dimapur, Aenjeti/January 10 (TYO): Department of Personnel & Administrative Reforms, Government of Nagaland ajanga totuyuba agütsüba ama Joint Resident Commissioner, Nagaland

House, New Delhi, Wenneyi Konyak, NCS-i January 8, 2024 nü nungi Resident Commissioner, Nagaland House, New Delhi mapa tali bena atar, ta sangdong ka ajanga ashi. Anungji office of the

Resident Commissioner, Nagaland House, New Delhi den sendakba maparen ajak tarutsü nung totuyuba ka magütsü tashi pai repranga atatsü, ta sangdong ajangasa ashi.

Ghaspani ACs nung sepaitem atema E-Roll adokogo

Dimapur, Aenjeti/January 10 (TYO): 4-Ghaspani I aser 5-Ghaspani II Assembly Constituency tem asoshi 01.01.2024 ya qualifying date ama Summary of the Last

Part of Electoral Rolls dak sendakba service election atema final Electoral Rolls January 10, 2024 nü adokogo, ta sangdong ka ajanga ashi. Anungji Officers/

Commanding Officers temi pei kübok aliba service personnel indang extract Final Rolls reprangdangtsü ayongzüker, ta sangdong ajangasa ashi.

ADC & ERO Mokokchung-i Electoral Roll atema metetdaksür



Mokokchung District kübok Assembly Constituency ter atema Deputy Commissioner, Mokokchung indang Conference Hall nung January 10, 2024 nü Final Electoral Roll adoktsüdang tangokba noksa ka nung Deputy Commissioner & District Election Officer, Mokokchung, ADC & ERO, ketdangsürtem aser political party balala nungi teshimtet nisungtem angur.

Dimapur, Aenjeti/January 10 (TYO): Addl. Deputy Commissioner & Electoral Registration Officer, Mokokchung, Chumlamo Humtsoe ajanga sangdong ka nung, 21-Tuli, 22-Arkakong, 23-Impur, 24-Angetyongpang, 25-Mongoya, 26-Aonglenden, 27-

Mokokchung Town, 28-Koridang, 29-Jangpetkong aser 30-Alongtaki Assembly Constituencies atema 01-01-2024 ya qualifying date ama aser Registration of Electors Rule, 1960 nung mela aliba ama Electoral Roll indang draft publication atema list of

amendments yanglua lir, ta ash. Iba Electoral Roll indang copy ka den shia aliba list of amendments ya adokogo aser Office of Addl. Deputy Commissioner & Electoral Registration officer, Mokokchung nung angutsü, ta sangdong ajangasa ashi.

Tanü NH-61 nung long poksatsü melar

Dimapur, Aenjeti/January 10 (TYO): NH -61 Angetyongpang Tzu River area nung DEF Church nungi Yisemyong tsungta 2-lane yanglutsü atema long poksatsü JKM Infra Works Guwahati Assam nem temelaba agütsüogo, ta Deputy Commissioner, Mokokchung, Thsuvisie Phoji-i sangdong ka nung ashi.

Iba maparen ya January 11, 2024 nikongdang 3:00 ako nungi

8:00 ako tsungta inyaktsü aser contractor temi iba lenmang amshiba nübürtem kumzüka aser ki o jen meraksai inyaktsüla, ta sangdong ajanga ashi.

Company ajanga tapet Act/ Rule 2008 sülen anidaktsüla aser takum aser ki o jen raksatsüba lira JKM Infra Works khuret asütsü aser iba temelaba ya January 11, 2024 nü atema dang alitsü, ta sangdong ajangasa ashi.

Indian Army ajanga agütsüba Nursery Teacher Training temogo



Kohima, Aenjeti/January 10 (TYO): Indian Army-i sponsor süa Kohima district kübok Zakhama aser anasa yimtsungtem nungi tetsür 22 nem Nursery Teacher Training (NTT) agütsüba temogo. Iba training ya Operation Sadbhavna kübok September 29 nungi December 29, 2023 tashi Peri Montessori Teacher's Training Institute, Kohima nung agüja liasü.

Iba training course ya "Empowered Women, Empowered Society" omen nung ajemdaker agia liasü aser iba training ya ajanga preschool tesayur akumtsü nükjidong aliba kaketshirtem yaritsü aser tila tanurtem tajungtiba nung

anitettsü. Iba training nung 'instructional strategies, children psychology, classroom management and cognitive development' amala subject tem sayua liasü.

Kaketshir temi training mapang tajungtiba nung shilem agi aser training tembanga Kenguruse Auditorium, Zakhama Military Station nung sentong ka ayongzüka liasü.

Iba sentong nung kaketshirtem parnok kinunger, tesayurtem aser kaketshir tentet balala nungi teshimtet nisungtem dena liasü.

Indian Army ajanga iba ama mapa tajung inyakba atema parnoki pelaba lemsatepa liasü.

Kohima aser Dimapur indang E-Roll final publication adokogo

Dimapur, Aenjeti/January 10 (TYO): Additional Deputy Commissioner & Electoral Registration Officer, Kohima, Rhosieho Ngouri, NCS ajanga political party balala nungi teshimtet nisungtem den January 10, 2024 nü Deputy Commissioner, Kohima indang Conference Hall nung senden ka mena political party ajak nem Electoral Roll (E-Roll) indang final publication agüja liasü.

Final publication roll nungya elector 1,21,880 lir aser item rongnung tebur elector 58,515 aser tetsür electors 63,365 lir ta pai ashi.

Political party balala nungi teshimtet nisungtemi yariba aser amalitep akaba ajanga mapang shidak nung iba E-Roll reprangshiba maparen tembanga liasü, ta pai ashi.

Clean election nung rangloker electoral roll nung tenung kar inok aser kar indok, ta paisa ashi.

01/01/2024 ya qualifying date ama aser Registration of Electors Rules, 1960 nung shia aliba ama 8-Western Angami, 9-Kohima Town, 10-Northern Angami-I, 11-Northern Angami-II, 14-Southern Angami-I aser 15-Southern Angami-II Assembly Constituencies atema draft electoral roll indang list of amendments yanglua lir, ta ADC

& ERO Kohima ajanga ashi.

Deputy Commissioner, Dimapur, Dr. Tinojongshi Chang, NCS den Additional Deputy Commissioner & Electoral Registration Officer, Dimapur, Mhalo Humtsoe aser Assistant Election Officer, Dimapur, Toshimongba nungeri January 10, 2024 anungdang 11:30 ako nung Deputy Commissioner, Dimapur indang office chamber nung Final Publication of the Photo Electoral Roll saya liasü.

Photo Electoral Roll indang final publication nung adenba political party tem dang DC Dimapur-i pelaba lemsatep aser recognize süa aliba political party tem arua E-Roll agitsü Election Commission of India-i mela lir ta ashi.

E-Roll summary revision mapang administration den yaritepba atema pai political party tem dang pelaba lemsatepa liasü.

Dimapur nung aliba constituency nung vote agütsütsü temsüa alir nisung 1,20,749 lir aser tenung 1,723 inoksem aser 549 indok, ta Mhalo Humtsoe, ADC & Electoral Registration Officer, Dimapur ajanga metetdaksü.

Tenung inokba aser indokba maparen ya tanen makai inyaker, anungji political party temi BLOs shima ketdangsür den yariteptsüla, ta lai ashi.

Taruba küm 25 nung India ya terenlok linük ka asütsü: PM Modi



January 10, 2024 nü Gandhinagar nung Vibrant Gujarat Global Summit 2024 nung Ato kiloner Narendra Modi, UAE Tir Mohamed bin Zayed Al Nahyan, Czech Republic Ato kilonser Petr Fiala, Mozambique Tir Filipe Jacinto Nyusi, Timor-Leste Tir Jose Ramos-Horta, Gujarat Angh Acharya Devvrat aser Gujarat Chief Minister Bhupendra Patel nunger tangokba noksa nung angur.

Gandhinagar, Aenjeti/ January 10 (Agencies): Bodhbarnü Gujarat state nung sentong ka nung jembidang Ato kilonser, Narendra Modi-i, taruba küm 25 tashi nungbo India ya terenlok linük ka asütsü atema sorkari nukjidong yur inyaker, ta metetdaksü.

Gandhinagar nung 10buba Vibrant Gujarat Global Summit nung jembidang Ato kilonser Modi-i, kanga kera melenshiba lima ka nung India ya alima nung tesayur mesüra alima atema medemer ka ama tejakleni odar, ta metetdaksü.

India nunger rongsenkettzüng ainba dak sendakba nung Modi-i, taruba küm ishika tsüngda India ya

alima nung rongsenkettzüng tulutiba linük asem rongnung adentsü ta rating agencies ajaki bilemer, ta ashi.

"Alimai India ya alima nung rongsenkettzüng ainba gol aser tashi aitba nung tongti tongshi ka ama repranger," ta paisa ashi.

Narendra Modi-i, "India nunger nüchiso anguba sülen tawa küm 75 abensaogo, aser tang linüki taruba küm 25 nung tongettsü alizüng nung rangloker inyaker. India nunger nüchiso anguba sülen küm 100 ajungba mapang tashi nungbo India ya terenlok linük ka kümdaktsütsü onoki tenangzükba agiogo," ta metetdaksü.

Inda summit nung UAE Tir Mohamed bin Zayed Al Nahyan, Czech Republic Ato kilonser Petr Fiala, Mozambique Tir Filipe Jacinto Nyusi aser Timor-Leste Tir Jose Ramos-Horta nunger densema linük balala nungi tongti lenirtem aika aden.

Kasa sentong nung India-UAE tesendaktep tajungba akümba atema Modi-i UAE Tir Sheikh Mohamed bin Zayed Al Nahyan nem tenüngsang agütsü.

Paisa, iba ya India atema nümatangtsü mapang ka lir, kechiyong G20 nung India Tir asüba mapang African Union ya G20 nung permanent züngsem ka kümogo, ta ashi.

Congress-i Ram Mandir semzükba sentong nung madentsü

New Delhi, January 10 (Agencies): Bodhbarnü Congress party-i, January 22 nü Ayodhya nung Ram tekülem ki semzükba sentong nung party lenirtem madentsü, ta metetdaksü.

Congress-i sangdong ka ajanga, "BJP aser RSS nungi lenirtemi ano merenemi aliba tekülem ki semzükba ya election nung tajanzük angutsü nukjidong nung lir," ta metetdaksü.

Kasa sangdong ajanga, "2019 küm Supreme Court obandangji party-i agizükba den külemi Ram akhümtsübur million aika nem akhüm agütsür, saka Mallikarjun Kharge (Congress Tir), Sonia Gandhi

aser Adhir Ranjan Chowdhury nungeri RSS/BJP sentong nungji madentsü telemteba agiogo," ta metetdaksü.

Ram tekülem ki semzükba sentong nung adentsü atema linük nung yimtenren lenirtem, saisapongertem aser nungtugu nisung aika jaokogo.

Iba sentong nung adentsü atema Congress lenirtem- Sonia Gandhi, Mallikarjun Kharge, Adhir Ranjan Chowdhury, taoba mapang Ato kilonser Manmohan Singh aser Bihar Chief minister Nitish Kumar, Lalu Yadav aser Sitaram Yechury nunger densema opposition lenir aika nem tejaokba shidi agütsüogo.

Congress nung bangdak lenirtemi iba sentong nung madenyonga iba sentong nung adentsü janrgr party lenirtem nembo temelaba agütsüogo.

Tawa Congress bangdak lenirtemi state units nung lenirtem den senden amendang Ram Mandir onük-a süoka liasü. Senden nungji Uttar Pradesh aser Bihar na nungi Congress lenirtemi Ram tekülem ki semzükba sentong nungji party lenirtemi adentsü akok asü? ta asüngdanga liasü.

Senden nungji Kharge-i, Ram tekülem kidangji sarasadentsü janrgr lenirtem dang party-i tetuyuba agütsütsü menüngdak, ta ashi.



January 10, 2024 nü AICC Headquarters, New Delhi nung Congress lenirtem 'Bharat Jodo Nyaya Yatra' atema senden amendang tangokba noksa nung angur.

'One Nation, One Election' atema luden den tebilemba aika lemsatep

New Delhi, January 10 (Agencies): Taoba mapang linük Tir, Ram Nath Kovind-i aniba 'One Nation, One Election' luden den nüburtemi tebilemba onük 5,000 dak tema lemsatepogo, ta Bodhbarnü osang ka ajanga metetdaksü.

Taoba hopta Ram Nath Kovind-i aniba committee jagi linük nung mapang ka nung dang election külemi agitsü atema tang lateta aliba inyakyim nung temelenshi benoktsü atema tebilemba onük asüngdanga liasü, ajioda tang tashi nung email 5,000 dak tema nguogo.

High-level committee jagi, One Nation One Election dak sendakba nung nüburtem dang nungi January 15 tashi tebilemba onük agizüktsü, ta metetdakja lir.

Yaküm September ita nung iba committee tentetba sülen tang tashi nung senden anaben menogo. Tawa committee-isa shidi ajanga yimtenren party tem dang anogo ka shimteter iba onük nung shisa lemsateptsü metetdakja liasü.

Committee-i shidiji national party trok, state party 33 aser registered unrecognised party tenet nem agütsüogo, ta osang angazüker.

Committee-isa iba onük dak

sendakba nung Law Commission tebilembatem asüngdanga liasü aser maneni parnok ajurutsü.

'One nation, One election' mapatong asadangtsü atema yaküm September ita tetenzüklen sorkari committee tenteta liasü; iba committee nung tongtiji taoba mapang linük Tir, Ram Nath Kovind lir aser tanüngba züngsemtemji-Union Home Minister Amit Shah, Congress lenir Adhir Ranjan Chowdhury, taoba mapang MP Ghulam Nabi Azad, taoba mapang 15 Finance Commission nung Chairman NK Singh, taoba mapang Lok Sabha nung Secretary General Dr, Subhash Kashyap, senior advocate Harish Salve aser taoba mapang Chief Vigilance Commissioner, Sanjay Kothari nunger lir.

'One Nation One Election' ya mezüng 2018 küm Law Commission of India-i benoka liasü. Iba mapatong kübok Lok Sabha aser state Assemblies election khenyongi dang agitsü.

Iba mapang nungji Law Commission of India-i, tang aliba linük temzüng kübok ibaji meinyaktetsü, anungji ozüng tasen agizüktsü nüngdaker, ta metetdakja liasü.



January 10, 2024 nü Gandhinagar nung Ato kilonser Narendra Modi aser Czech Republic Ato kilonser Petr Fiala na senden amendang tangokba noksa nung angur.

Bengaluru Startup CEO kati lar jabaso alenseta südaktsüba jangjaogo

Bengaluru, January 10 (Agencies): Bengaluru nung aliba AI company ka nung CEO kati lar jabaso arrshi küm pezü alenseta südaktsüba sülen lasasa asütsü merangba sülen la puogo.

La takdang nung aliba azüji lar jabaso zü masü saka la zü liasü ta jangjaogo.

Postmortem report ajanga tanur tebur kaji alenseta südaktsüba jangja. Suchana Seth ya artificial intelligence start-up ka nung chief executive officer (CEO) lir. Lai sü mesüra pillow amshia lar jabaso alenseta südaktsü asütsüa akok.

"Tanurji alenseta südaktsüba lir. Tanurji teka agi alenseta südaktsüba masü saka pillow mesüra tanga oset kar amshia südaktsüba asütsüa akok," ta Hiriyur Taluk Hospital nung

doctor kati metetdaksü.

Iba tatalokba dak sendakba nung FIR ka benokogo aser Goa court-i tai tonglokja alilaji anogo troknü atema police ket nung agütsüogo.

Hombar aonung Karnataka kübok Chitradurga nung police-i la apu. La Goa nungi Bengaluru-i aoba mapang la apu. Tanur tasümanngji suitcase ka nung angu.

Seth ya AI ethics nung mongin ka lir aser data scientist ka lir. La ya 100 Brilliant Women in AI Ethics List nung densema lir.

La ya University of Calcutta nungi postgraduate lir, Raman Research Institute (RRI) nung research agi aser Harvard University nung aliba Berkman Klein Center for Internet & Society nung küm ana liasü.



TIR YIMYIM YIMOBILEM (EDITORIAL)

DIMAPUR YANGTEPNÜ, JANUARY (AENJETI) 11, 2024

Naga nungerbo ola madoker !

Naga nungertem ya, akhi memesük, langka agi alak ama nungshiaka ola madok kümogo. Kasa India nung alirsa asüyonga, tangarbo tatar hoho nung kechisa jembir aser kechisa lemteter ta angadang narongsa atar. Aji oda, center government-i lemtetba sentongtem jagi pei state aser nübortem ajangzüker asü majangzüker ta bilemdanga angatetsü meranger. Itemji tekümküm aser saksalema aliba sensotem lir, anungji yimten yimsüsürtemia item nübortemjibo akhümtsübur aser telemtetba magidang shisa agiteper. Aji oda, linük nung tawa amenba tatar hoho senden nung gari agi tsüker ajenba temerenshi, gari anisang dang senchi tulu achiba den küm ter tepuokdak ayutsü laletba ozüng anema pi tekümküm sensopurbo Punjab nungi Assam tashi nung gari anishirtem longjemer longkak aita ola adokba asenoki angashiogo. Gari agi tsüker ajenba temerenshiji asenok Naga nungertemibo tsümar gari ashirtem asoshi latettsüba ozüng amato bilemer asütsüa akok. Ajisüaka, gari anishir ta asüba nungji asenok gari tila aser tulu anishir ajak dena lir. Iba ozüng tasenba ya magien dang asenok rongnung nisung mashi kati gari agi tangar dak tsüker jenra, pa mesüra la dang linük ozüng agi senchi sen lakh tenet achitsü mesüra küm ter atema tepuokdaki yoktsü. Ibaji melaa angatetsü atema, tatishitsü agi, na Nagaland nungi Assam ajanga nü gari bener aeni aodang ajungbenaka nai nisung ka dak atsük, ajisüaka yangji nai iba nisungji anepalutsü anenra, ashiko lokti arur na züksettsüa akok, anungji nü taküm kümzüksü asoshi na jena ao. Ibaji atema nü dang senchi sen lakh tenet achitsü mesüra küm 10 tepuokdak ayutsü. Atangji, nisung dak tsüker ajenbaji majung, anungji gari anishisangji tai süra merenshitsüla, ajisüaka pei taküm kümzüksü atema ajenba asoshi senchi sen lakh tenet agütsütsü mesüra küm ter atema tepuokdaki aitsübjibo junga mebiledangi temerenshi agütsüba mapa ka asütsü. Ajisüaka, asenok Naga nungertemibo ajia aremer südi. Atangji, asenok Naga nungertemi asen meketa atalokbatem metettsü memeranger, asenokbo shi den chi chiyongra ojang, tanüngba nungdakjibo MLA-ba dang ashitsü aser Naga nunger yimten yimsüsürtem asoshia center nung lemtetbaji aitsütsü makoker, kechiyong aji pei chiso aküpdoker amai bilemer. Ano Naga nunger atema gari agi tsüker ajenba temerenshi latetba ozüng dang nungi tesashiba aser tuluba timtem aser takoksa ajurutsüba ozüng tasen kaji India o Myanmar na tsüngda lung jara yanglutsüba ya asütsü. Iba ozüng jagibo külemi liasüba kinungertem dena menguteptsüsa lung jara agi bendangtsütsü. Asenoki angatetsü agi, iba Indo-Myanmar lung jara yagibo Longwa yimtak Angbaer ki tiyong ser külen India aser külen Myanmar ta ana küma piladaktsütsü. Kasaji Mizoram nung ataloktsü. Iba jagi tejashi aser shisabolu marem Mizoram chief minister-ibo par Mizo lushi nungbo iba lung jaraji meyangludaktsütsü ta oagi Delhi nung yimten lenirtem ajurua jakdaka shiogo. Ajisüaka, asenok Naga nungertembo tanü tashi ola madoker. Ashiko, asenokibo lung jaraji yangludaktsünüa alitsüa akok mesüra iba sentong ya mangatet, memetet aser mangashiba agi asütsüa akok. Asenok ya temang aser tokolok ajak kanga pezüa kümogo. Shitakba agibo, item ama sentongtem jagi asenok mulung tipmatemtsüla aser Mizoram chief minister-ba dang nungi asenoki tama ola adoktsüla. Asenok Naga nungerbo kechiba election nung dang aser relief jang alemdak dang ola adoker? Asenoki manganütsüa akok saka Nagaland nung tulutiba nungi tilatiba tashi kar pi kilir aser kar pi lar ta kümer ola madoktetba tensa tia ka nung lir. Alima nung pei asoshi yabo junger aser ajibo majunga ta yimten dang tetsüba agi meshitetba sensoji nüchi masü. Asenok tenük agi mangur saka asenok ya tangari merang yinzü agi alener sen terara agüja Nagaland ta ser alima tila ka nung puoka yua lir. Asenokbo pelapelar saka asenok pelaba ya suwar pela pelar.

OLEMSABANG

Father School

~ Temjentenzük Changkiri

(Yashi adok nungi...)

Kü temeim kinungtsü Tajung, Tamasa kü temeim azüet agütsür. Yasüng kodang ni Father School nungi ki atong, ne den asen tanurtem kanga topur junga mejanga liasü, ibajagi Korea nungi aruba ozü tesayuri ki tongli dang kinungtsü aser tanurtem dak azüetang ta shiaka, kü mulungi nenok nangnanga mejanga aliba minprong mesüdaktsünüi liasü. Saka ya temulung nung yuang, na joko tang nungi item temeim azüetbatem agi anünga malitsü! Ni nangzüker, ejemla!

Ejemla, ano tang tashi "anüng sentsü" to dang asü? Naia bilemteter südi, ni na asüngdangba mapang, ne dang na telangzüba kechi, "tamak asü temerem" ta asüngdang dang, nai, "anüng sentsü" ta langzüba agi nai ni koma peladaktsü! Ana temeim tetenzüklen mapangtem to ano tang tashi ni kanga menungra bilemteter. Iba mapang to na kanga topur junga liasü, saka ano tangsa topur tajungba lir! Anogoshia ya ni atemabo topur tajung anogo ka lir, kechiyong na kanga topur tajung lir! Na kü kinungtsü aser medemer asütsüsa tiatsüba ya Tsüngremi kü dang taochi sayuba lir. Tanü, ni ne dang kü mulung taroktiba nungi kanga pelar ta shiner. Adangji, na ama topur tajung alima rangben telungtet nung shinga mali! Naji künük nung mezüng angudang koma liasü, yamaji topur junga tang tashi lir, aser asen arishi kümtemi menepa tain akümdanga maneni künük nung naji topur tajungba dang akümtsü. Ni kanga sasa bilemer, tesüiba mapang nung aiben mangatet tebu ka ama lioko! Imlibilema kü nem tatok agüjangma, kechiyong tangbo


Tsüngrem taochi agi asen Korean adianutem ajanga ni melenshiogo. Parnoki ni kodanga mangashidangba lesson aika sayuogo. Parnoki kü menentem asoshi Tsüngrem dang tatok meshitsüsa ni yariogo. Ano asünga (19th August 2009) ni parnok nungi aika angazüktsü matateter. Ni kechi angazükogo ajakbo zülu ajanga melemsatsü, saka nai ni ajia atangma, ni mapa agi ne dang sayutsü! Nai teti inyakba ama, ejemla, ni atema sarasademjangma. Asen kibong ya ne tesüngjem, taremsük aser sarasadem nung noktaka lir. Adangji, tetenzüklen asen kibong nung tesashi yipru mopung ajak ne taremsük aser ajemalu ajanga koktetba lir. Kü dak tashi mait jenti liaka tanü tashi nai kü dang o tamajung ojang ka danga ashiba ni mebilemteter. Nai timtem khuret ajak süngjemsüngjema aser konang ka ama benogo. O, ni ne dang kanga pelar, ejemla. Na ama ka mesüra asen kibong iba tashi ya metongtetla! Ni na meimer, ni na kanga meimer. Na adangji kangasa tesüngmangtsüka lir! Kü ejemla, ni ano asen tanurtem atema ne dang kanga pelar ta shiner. Nai parnok kanga junga anepaluba atema. Asen tanurtemji nübu tajung küma intet nungbo ibaji tanga masü na ajanga lir. Kanga pelar. Ni joko tang nungi tashi tasen aser tejangraba tulu nung asen tanurtem anitetsü aser asen kibong yangerba nung ne den shilem agitsü.

Tatem nung naia Tsüngrem aser Korea nungi aruba adianutem dang kanga pelar ta shidaktsüner. Parnok taküm atema asenoki Tsüngrem tenüng asangtsüla. Kü temeim na aser asen tanurtem atema teti peria lir.

Temeim, Kinungbu.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Methodist Arogoi Tsüngrem O melenshitsu meranger: Franklin Graham



January 10, 2024: Nüngtugu sayutsüngir, Franklin Graham-i, Methodist Church of Great Britain-i Tsüngrem O melenshitsu meranger, ta aitsü. Methodist Arogoi züngsemtem dang 'kinüngbu' aser 'kinüngtsü' ta asüba onlong mamshitsu tuyua "Inclusive Language Guide" sayaba sülen

kiymtsü atema Laishiba nung shia lir. Laishiba nung aliba kaket 38 nung 'kinüngtsü' ta asüba onlong ya Lai tekong 360 nung zülua lir. Parnoki sobaliba melenshiba sasep nung Tsüngrem O nung shia aliba aser sayuba melenshitsu meranger. Laishiba nung asenok dang tekümdangtsü shia lir. Khristantem ama asenok dang Tsüngrem ochi o lemsateptsü ajungshir, koba ajanga taküm lenmang ajak lenitsu," ta metetdaksü.

December ita nung Methodist Arogoi sayaba "Inclusive Language Guide" nungji 'kinüngtsü' mesüra 'kinüngbu' onlong mamshitsu ta shia lir.

Methodist Arogo indang Book of Discipline nungji LGBT lenirtembo ordain masütsüla aser kasa tetsür o tetsür na mesüra tebur o tebur na kiyimba memelar.

2023 küm nunga alima tesem balala nung Khristantem kangareshikangshi

Washington, D.C., January 10, 2024: Tenyartem mapang nungi tenzüka tang tashi alima nung Khristantem reshikangshiba manener, yamaji 2023 küm nunga alima tesem balala nung Khristantem kangareshikangshiogo.

Khrista atema taküm bendanga agüja asür mezüngbubaji 34 AD nung Stephen liasü, aser tanü tashi Khrista atema nisung aika asür.

Alima tesem balala nung yimsü temeden tamajungba dang akümer aser tesüba küm 30 tsüngda yimsü temeden jenjang ano tamajungba dang kümogo, ta Khristan melungtet telok

Open Doors-i metetdaksü. Tang alima nung Khristantem tamajungtiba reshikangshiba linüktemji North Korea, Somalia, Yemen, Eritrea, Libya, Nigeria, Pakistan, Iran, Sudan aser

India linüktem lir.

Aid to the Church in Need (ACN)-i ashiba agi, tang alima nung nütsüng shilem 50 shibo sorkar mesüra telok balalai yimsü nung ajemdaker reshikangshiba linüktem nung lir aser item linüktem rongnung Nigeria, Pakistan, Afghanistan, Somalia, Saudi Arabia aser North Korea densema lir.

Alima nung Khristantem tamajungtiba reshikangshiba linüktem- "red" category linük 28 nungi linük 23 nung ano reshikangshi jenjang tamajungba kümogo.

Nigeria nung kin tsüngda mesüra yimsü nung ajemdaker nisung tepsetba kanga ataloker. Christmas mongpu kija nunga Nigeria kübok Plateau state nung Khristan 200 shi tepseta liasü.

Libya linük nung Khristantemi Muslim nung dang Khristan yimsü dangi


meiyptsü ajungshira tepuokdak ayutsü. Khristan yimsü indang sayutsüngiba agi yaküm April ita nung Libya nung Pakistan nung ana aser Pakistan nung ka pua liasü.

Mozambique nung Islamic State kiralongrartemi Khristan tetsürtem pua shi nung medema alar ama ayur aser kangshia Islam yimsü dangi meyipdaksür. Ano Islam yimsü dangi meiyptsü memelungertembo tepseter.

Nicaragua linük nung Tir, Daniel Ortega yimsüsüba kübok Khristan school tem shibangtsür, Khristan lenirtem apur aser Khristantem reshikangshir.

December ita nung Christmas sülena sorkari Khristan putir pezü pua liasü. Iba linük nung sorkar ketdangsertemi Bishop Rolando José Álvarez densema Khristan putir 10 dak tema pua lir.

China nung Khristan putir Peter Shao Zhumin apu



Peter Shao Zhumin

January 10, 2024: December ita tomnen China nung Zhejiang province kübok Wenzhou nung Khristan putir Peter Shao Zhumin apuba sülen anogo

ishika lir chioka liasü, ajisiüka Zhejiang nung Khristan tekülem sentong agiba nokdangtsü atema Christmas anogo nung maneni pa apu, ta International

Christian Concern (ICC)-i metetdaksü.

China police-i mapang shia Peter Shao apur, kechiyong pai sorkari melaba Catholic Patriotic Association (CPA) nung adentsü memelunger.

Chinese Communist Party (CCP) aser ketdangsertemi pa dang aben-süoshi peria benang ta ashi, anungji pa mapang talangka tepuokdak ayutsüa akok.

2016 küm nungi tenzüka mapang shia sorkar ketdangsertemi Peter Shao apur aser pa indang ministry nokdangter.

Wenzhou yimti dang "Anüdoklen aliba Yirusalem" ta ajar, kechiyong iba yimti nung Arogo aika lir aser Khristan nütsüng aika lir.

ANO GO ABEN TSÜNGREM DEN

Walokwatem mesüra tesendaktep?

Aser shinga mesenzüba lima aser nisung shinga malidak, Ijip nungi onok anitetba Kibubaji kong lir ta parnoki tashia mashi. Yeremia 2:6.

Khristan yimsü Yisu Khrista den kanga anasatepa aliba aser Pa den tesendaktep nung ainba lir. Iba yimya süpaa amshitsuüba tamang tesayuba ka masü mesüra temenen paitokba masü. Tsüngremi tenyaba mapa ajakji Pa temeim Pa nüburtem den lidaktsütsü atema lir.

Tsüngremi tekülemji asenoki Pa sentsüwangshi ngudaktsütsü aser Pa den apet asenok nungi telangzüba angutsü asoshi tentet, kechiaser aikati ibai yimya süpaba mapa ka, tekülem sentep nung ken atentsüba yimsü ka dang kümdaktsü. Tekülem sentepi aobaji Tsüngrem sentsüwangshia pa den ajuruteptsü nükjitong nung masü saka tekülem sentep nung metenra tangari tamanger masü ta ashitsu tsübuba agi aor aser atener. Tsüngremi tenla agütsüba yimyaji asenoki Pa nüburi, asenoki Pa dang meimba ajunga sayudaktsütsü asoshi tentet; saka aiben asenoki Pa mesüzükba aser asenok aibelenba Pa ain adokba ajema kümdaktsütsü tangatetba nung inyaker. Asenoki Tsüngrem den sensaksem tettsü asoshi Pai asenok dang sarasademtsü sayu, saka aiben asenoki ibai sarasadem ajanga raksar "sarasademer" aser asen Tebu mulungjang nung kechi bilema lir aji mangai aritepa toktsür aor. Tsüngremi shirnok meimer parnok kümzüksü asoshi ozüngji tenteta ayu, saka ibai Tebu den tesendaktep yangluba lemanng masü ozüngyim lemanng kaang kümdaktsü. Tamajung nungi kümzükdak lemanng masü saka temeren shi agütsüba lemanng ka kümdaktsü.

Tsüngrem den telungjem nungi pilar tamangba yimsü mapatemji tazüngla walokwatemba lir. Yeremia mapang nung nüburtemi Tsüngrem meteni walokwatemba nung temulung süa liasü. Parnok yimsü nung parnoki temulung lema liasü aser parnok den Tsüngrem matenba parnoki memetetti liasü. Tsüngrem meteni sarasademtsü, tekülem nung atentsü mesüra tenla agütsütsü takoktsü asü? Atangji ibai takoktsü! Khristan aika asoshi ibaji tesasatsü mapa lir. Yisu Khrista den tesendaktep makai yimsü nisung ka tesü. Kodang Tsüngrem dena lidir tepilaji tejangja asütsü.

Uttar Pradesh nung anti conversion ozüng kübok pastor ana apu

January 10, 2024: Uttar Pradesh state nung Prohibition of Unlawful Conversion of Religion Act kübok pastor ana puogo.

Uttar Pradesh kübok Ayodhya district nung December 31 nü Pastor Arun Kumar aser Pastor Ram Tahal na leniba nung tamanger 100 shi sarasademtsü atema adenshia liasü. Parnok sarasademba mapang nung Hindu yimsü alia amanger kati police dang, tesem ka nung Khristantemi tangartem Khristan yimsü dangi meyipdaksür, ta metetdaksüba sülen police-i pastor Kumar aser Pastor Tahal na apu.

Police-i Uttar Pradesh Prohibition of Unlawful Conversion of Religion Act, 2021 kübok pastor ana anema ken o benok.

Hindu yimsü alia amanger Arvind Kumar Pandian-i December 31 nü First Information Report (FIR) benokba sülen Khandasa police station nung pastor ana anema ken o benok.

Mahua yimdak alir Pandian-i police dang, December 31 nikongdang pa kidangi aoba mapang nung pai lokti ka Kumar'er ki anasa adenshia angu, ta ashi.

Paisa, Kumar aser Tahal nati Hindu nung lokti ka ayongdenba sülen parnok dang Khristan yimsü indang sayutsüngi, ta metetdaksü.

Pastor ana jagi Hindu nungertem Khristan yimsü dangi meyipdaksütsü atema teyari balala agüja mesüzük, ta pai tai tongloksü.

Tang tashi pastor anaprong jail nung lir.

**AO OSHI ANGAZÜKDAK:
TANÜ ANGAZÜKTSÜBA OJANG**



Shinü

(n) Naro tzu jema aliba tashikang aketba takümsangnu (butterfly)

* Asenoki shinü metepsettsüla.

Shinü

(n) sali achidang patio nung nüloker achiba (lime)

* Asen lima nunga shinü lung aika lir.

OLONG PAITEP # 6663

1			2		3		4		5
6		7							
					8				
9				10					
						11			
			12						13
	14							15	
					16				
			17						
								18	
19									

TIPIEN

- 2. Teburtemi tejak nung awaba
- 6. T ___ em
- 8. Tzük ayudak
- 9. Nüngdakba dang timba
- 11. Züina ao
- 12. Yangi tzu angur
- 14. Tangar dang nungi tali
- 16. Senyong masü
- 17. Oadokdi
- 18. Tzu tarok
- 19. Yimtaklir aikati iba ya ki den külemi yanglusemer

LANGTSÜNGLEN

- 1. Temejangdak
- 3. Nisung ka mapa inyaksü nübo
- 4. Azüntsü asoshi mejemba
- 5. Tesangwa agütsüba
- 7. Tila masü
- 10. Tebenjem tetsür chanu
- 11. Tekolak nung inok
- 12. Tetsüngda
- 13. Tangar inyakba ka inyak
- 14. Tim masü ta ashi
- 15. Asalendong
- 16. Tanü dangtsü

OLONG PAITEP # 6662 TELANGZÜBA

TIPIEN :

- 1. Telok, 4. Aluru, 6. Ozüng,
- 8. Emk, 9. Kin, 10. Teti,
- 12. Süir, 13. Jen, 14. Ola,
- 16. Talak, 17. Mazük.

LANGTSÜNGLEN :

- 1. Tenükjang, 2. Luden,
- 3. Kiochtsü, 5. Lenti,
- 7. Tajanzük, 11. Teronem,
- 12. Sempa,
- 13. Jahaz.

NAI-A YA METETTER MA



Chief of Naval Staff Admiral R Hari Kumar-i January 10, 2024 nü Drishhti 10 'Starliner' Unmanned Aerial Vehicle (UAV) sayatsüogo. Drishhti 10 'Starliner' ya Adani Group-i Navy atema yangluba lir aser iba UAV ya Intelligence, Surveillance and Reconnaissance (ISR) lir. Drishhti 10 'Starliner' ya 36 hours endurance aser 450 kgs payload capacity atema yanglu aser STANAG 4671 certification nguogo. India nung yangluba drone ya naval maritime operations nung bendenlochtsü aser tanü Telangana kubok Hyderabad nungi Gujarat kubok Porbandar-i bener ogo.

Tanü Sanam Puri-i Zuchobeni Tungoe na kibong akümtsü



Guwahati, January 10, 2024

(Agencies): Nüngtugu Hindi kentener Sanam Puri-i model-singer Zuchobeni Tungoe den January 11 nü kibong akümtsü.

Tena kiyimba sentong ya Nagaland aser Punjab nung agitsü aser Sanam-i osangbener den sensaksem dang tesem anaprong nung kiyimba sentong tobur ajang sayunür ta ashi.

"Nagaland tobur ajang sayua küna kiyimba sentong agitsü renema lir. Küna indang nija estate ka nung iba sentong agitsü. Onoki kinungertem aser medemertem iba tepela benjung nung arua shilem agitsü yongyar" ta Sanam-i ashi.

"Küna indang wedding theme ji Punjabi inyaksangshi den Naga sobaliba meyoktepa lir" ta paisa

ashi.

Sanam aser Zuchobeni na kiyimba sentong ya anogo ananü benjung asütsü. "Künati jaokertem ya küna den tesentaktep tajung alirtem lir aser Naga sobaliba nung amendaker lir. Yimtsüng ajunga iba tepela benjungmong nung adentsü jaoker" ta Sanam-isa metetdaksü.

Sanam Puri ya 'Dhat Teri Ki' (Gori Tere Pyaar Mein), 'Ishq Bulaava (Hasee Toh Phasee) kentem ajanga nisungtemi kanga meteta aküm. Pa ya Sanam ta ser pop-rock band nung lead vocalist lir.

Zuchobeni Tungoe ya kentener ka lir aser lai indang YouTube channel nung anogoshia ka taküm otsü lemsateper.

Zuchobeni indang Instagram stories nung lar medemertem la nem bridal shower ka agütsüba lemsatepogo aser laisa "Bride to Be" ta balloons agi züluba indang clip ka sayu.

Centre-i Arunachal nung lenmang atema Rs 1782 crore lemsüktsü

Itanagar, January 10, 2024

(Agencies): Arunachal Pradesh nung gari lenmang tongtipang ka yanglutsü atema Centre-i Rs 1782 crore lemsüktsüogo.

Centre-i Arunachal Pradesh nung kilometre 82 talang greenfield road yanglutsü atema sen lemsüktsüogo ta Union Minister of Road Transport and Highways Nitin Gadkari-i Bodbarnü metetdaksü.

Iba lenmang yagi Upper Siang

district nung Pango aser Jorging sendakteptsü. Iba mapatong ya package-1 aser II lemsar inyaksü ta Gadkari-i ashi.

"Iba mapatong ya traffic tiptemtsü, iba temeket nung yimtsüngtem sendakteptsü aser district nung tenemlen aliba tesemtem nung socio-economic development angutsü" ta paisa ashi.

Iba lenmang tongtipang ajanga sepaitemi arrtsülen

melamela atongtsü, ta Gadkari-isa ashi.

Arunachal Pradesh chief minister Pema Khandu-ia iba osang atema pelaba metetdaksüogo.

"Iba tongtipang mapatong ajanga arrtsülen connectivity kanga ajungtsü, rongsenketzung renlochtsü aser asen security forces mapa kümzüktsü" ta Arunachal Pradesh chief minister-i ashi.

Assam DGP-i lanurtem dang kümdanga alitsü metetdaksür

Guwahati, January 10, 2024

(Agencies): ULFA-I den mepetmesü adoka aliba mapang ka Assam director general of police (DGP) GP Singh-i Assam nung lanurtem dang kümdanga alitsü osang metetdaksüogo.

Ozüngi noktanga aliba ULFA-I teloki recruitment drives agiba nung shilem magitsüla ta Assam DGP GP Singh-i ashi.

"ULFA-I camps nung alirtemi lendong maliba tesemtemi oa alitsüla" ta Assam DGP-isa ashi.

Tawa Assam sorkar, police & security forces den ULFA-I tsüngda o atsütepa arur.

Myanmar nung United Liberation Front of Assam-Independent (ULFA-I) tesem ka drone amshia makogo.

India nung cross-border operations inyakba teseptem rongnung iba tese ya ka liasü.

Indian Army-i Myanmar nung drone amshia onok tese ya ka liasü ta ULFA-I-i metetdaksüogo.

Arunachal Pradesh nungi drones yok aser iba mapang drones asem tashi amshi ta ULFA-I-i ashi.

Mezüngbuba drone ajang anepdang 4:10 ako, tanabuba drone-i anepdang 4:12 aser

tasembuba drone-i anepdang 4:20 ako nung amak. Iba lendong nung ULFA-I züngsem ana yiru.

"India sorkari item inyakyim ajanga onok tangatetba samatsütsü ta bilemra, kanga tai lir" ta ULFA-I-isa ashi.

Pareh Baruah-i aniba ULFA-I ajang yimjung olemtep nung adentsü memulungba sülen India aser Assam sorkartem ULFA-I anema mapa inyaker.

Assam balaka razüka aotsüba onük maden tashi olemtep nung madsütsü ta Pareh Baruah-i metetdaksüogo.

**GOVERNMENT OF NAGALAND
OFFICE OF THE LABOUR COMMISSIONER
New Capital Complex
NAGALAND: KOHIMA
BOILER ATTENDANT EXAMINATION
NOTIFICATION**

Dated Kohima, the th January, 2024

No. LBR/F&B-3/3/2022: Application are invited from the candidates for Boiler Attendant Examination of II classes to be held on February/March 2024 as per The Nagaland Boilers Rules,1996. The exact dates and place of examination will be notified later. The experience and age are counted as on 31st December,2023.

QUALIFICATION.

A candidate for a certificate of competency as a Boiler Attendant of second class shall not be less than 20 years of age and shall not be admitted to the examination unless he proves to the satisfactory of the Board that he:

- a) Has passed matriculation or equivalent exam from a recognized institute or board and
- b) Has served for not less than three years in the capacity of a fireman or an assistant fireman on a steam boiler or a combined steam engine and a boiler; or
- c) Has served for not less than three years as an engine fitter where boilers and engines are repaired, made and worked under stream, one year at least of which he should have worked as an assistant fireman or
- d) Produce from the head of an Industrial or Technical Institute a certificate stating that he has completed three years course in the relevant field and has served minimum of one year as an apprentice of steam power plant or a mill or factory or an engineering workshop for the maintenance of boilers.

Necessary application forms and instructions to the candidate will be available in all the District Assistant Labour Commissioners Office. The last date for submission of the duly filled application will be 31st January,2024.

(Er. S. L. WATI AIER)
Chairman
Nagaland Boilers Board cum
Labour Commissioner and CIF&B
Nagaland, Kohima.



Guayaquil, Ecuador nung live broadcast mapang nok-nü bena aliba nisung telok ka sapoka aitba sülen police temi TC television channel station nungi staff tem anizüker aoba noksa nung angur. Tepuokdak nungi tashi tulu aliba mapa tamajung inyaker telok ka nungi lenir ka jena aoba sülen Ecuador sorkari state of emergency sangdonga lir.

Tshering Tobgay tanaben Bhutan ato kilonser akumtsü

Thimphu, Aenjeti/January 10 (Agencies): Bhutan indang parliamentary elections nung takok anguba sülen People's Democratic Party (PDP) ajanga sorkar tasen ka tentetsü lir, ta linük indang electoral body ajanga ashi.

PDP lenir aser arishi küm 58 tain Tshering Tobgay, shiba 2013 nungi 2018 tashi ato kilonser inyaka liasü, pa küm pongu kümsük tanabuba ato kilonser akumtsü lir.

Iba linük tila nung election agir anogo ka sülen Election Commission of Bhutan (ECB) ajanga provisional results sangdongba nung PDP ajanga takok anguba shia liasü. Bhutan nung democratic elections agi tenzüker taküm agi küm 15 jungogo.

Züngsem 47 aluba parliament mesüra National Assembly nung PDP ajanga menden 30 nung takok angu aser tanüngba menden ya Bhutan Tendrel Party (BTP) dangi ao, ta ECB ajanga

Bodhbarnep vote azüngba mapang ashi.

PDP ya Tobgay-i 2007 nung tenteta liasü.

Linük indang constitution nung gross domestic product (GDP) melen "Gross National Happiness" ang asadangtsü shia liaka Tobgay yagi rongsenketzung tajungba kumdahtsü aser unemployement rate ajemdaktsü nungzuka nübuyima liasü.

Vote agütsür shilem 65.6 liasü, kong vote agütsü temsüa alir nisung 498,135 nungi nisung 326,775-i vote agütsü, ta ECB ajanga ashi. BTP aser PDP nungi candidate 94 agütsüba nungi parnoki parliament züngsemtem shima liasü.

November ita round mezüngbuba vote agütsüdag party danga asem tsükdaktsü aser yangji tang yimsü tesüdak centre-left Druk Nyamrup Tshogpa party dena liasü.

China aser India tsüngta

aliba iba tebour tajung linük ya teyari aser tourism nung metaloka alir, saka COVID-19 pandemic sülen shia maruteti tim atemer.

Bhutan linük asoshi teyari tulutiba ya India-i agütsür aser iba linük ya China den tesendaktep maka aser arütsü mangatetep asoshi Beijing den jembishinüba mapang lir. Iba ken o jembiba ya India-i kanga junga repranga atar, shirnok China den arütsü tsütsü kensü-ösü lir.

"Bhutan nung parliamentary elections akokba atema kü tembar @tsheringtobgay aser People's Democratic Party den tepela lemsateper. Asenok tesendaktep tali tashi itshitsü atema külemi inyaksü imla atar," ta India Ato Kilonser Narendra Modi-i X nung post asü.

Iba linük ya akhi mapang nungi chubai dang yimsü süa aru, saka 2008 küm parliamentary sorkar dangi meyip.

TEPELA LEMSATEPER



Asür Mrs Narojemla Kichu (Chungtia)

Aso: 15-03-1939

Asü: 06-01-2024

Onoki teti meima aliba asür Ojala **Narojemla**, shirangba mapang nungi tenzüker tasüba anogo tashi nung ana aser talang nungi Arogo, Yimden, Lokti tentet balala, kija aser kibong shirnokisa onok mangyim jashi nung alidang nenok shisatsü, nübu, rongsen aser sarasadem agi yaritepa aruogo, nenok mapa tajung asoshi onoki temulungjang taroktiba agi kangasa pelaba lemsateper.

Onoki nenok temeim mapa asoshi meyipa agütsü kecha maka saka Tematiba Tsüngremi nenok nem talubosa moajangma ta ozü kinungertem sarasadem. Amen.

Chirnurtem, Semchirtem, Kinungertem aser Anükapang.

MULUNGNEN O



ASÜR KIKASANGLA
15.12.38 - 31.12.23

Onoki teti meima aliba Ojala asür Kikasangla (Longpa) la 31.12.23 nü iba akumtir wadang tempangba mapang nung shirnokisa ozü mangyim jashi aser mulungzüreb tia nung alidang sarasadem den nepu, rongsen aser shisatsü agi yaritepogo nenok ajak dang kanga pelar. Tongtipangsa tembartem, yimer yimsangertem, kiyonger, DABA, Dimapur Sangtam Baptist Lithro, Longpa Yimsen Putu, Longpa Yimsen Arogo, DLST, DLT, temeimertem aser kinungertemi yariba ajanga onok kanga anisüngoko.

Tulusang Tsüngremi nenok ajak molamoshia moajangta ozü sarasadem.

~ Temeim Kinungertem.

Houthis-i khaloktsüba drones aser missiles US, UK-i khazüka yok

Sana'a, Aenjeti/January 10 (Agencies): Yemen indang Houthi telungpuri southern Red Sea anasa drones 18 yokba khazüka yokogo, ta United States mitkar indang Central Command (CENTCOM) ajanga ashi. Ibai hopta tenet tsüngta Yemen telungpuri international shipping lane nung 26 ben buba amakba alitsü.

United Kingdom aser CENTCOM den külemi inyakba sepaitemi ashiba agi, anti-ship cruise missiles ana aser anti-ship ballistic missile ka khazüka yok.

Iran den sendaktepa aliba telungpur Houthis temi Yemen nung parnoki amokbanga aliba tesem nungi southern Red Sea nung UAVs, anti-ship cruise missiles aser anti-ship ballistic missiles khalokja amak, ta CENTCOM ajanga Bodhbarnü sangdong ka nung ashi.

Turkey nungi India-i aoba mapang November 19 nü Galaxy Leader rong hijack asüba sülen Houthis temi Red Sea nung rong jajaba tzu lenmang nung ibai 26 ben buba amaker alitsü. Galaxy Leader ya gari abenba rong ka lir. Israel-i Gaza nung raraba anema iba tesem nung amak tenzüker, ta Houthis teloki ashir.

Iba operation nung Dwight D Eisenhower aircraft carrier nungi fighter jets, aser UK nungi ka densema destroyer pezü shilem agia liasü, ta CENTCOM ajanga ashi.

UK Defence Secretary Grant Shapps-i ashiba agi, HMS DIAMOND den US warships temi Red Sea nung Iran-i yaria Houthis-i amakba aridok.

HMS DIAMOND indang prangbong aser sea viper missiles temi attack drones aika raksatsü aser ibai ozüng alema amakba lir, ta pai X nung ashi.

Nisung yiruba mesüra ki o jen raksaba osangbo mali.

Red Sea nung senzüba rong amakba nokdangtsü mechi taoba ita US-i international maritime coalition tentet, kechiaser rong aika lenmang talangba bushia southern Africa meketa aor.

Israel-i Gaza nung amakba manen tashi amaktsü ta Houthis temi ashir.

Hopta tatemlen Yemen nungi yokba drone ka US sepaitemi khazüka yok, ta CENTCOM-i ashi aser Middle East nung US naval forces commander Vice Admiral Brad Cooper-ia sangdong ka nung, taoba hopta

Houthis temi tapoktsü oset bena aliba sea drone kar rong jajaba lenmang leni yok aser tang rara nung iba ama nok-nü tang mezüngbuba amshir, ta shia liasü.

Houthis temi Israel den sendaktepa aliba rong tem nung tenük yoker ta ashir, saka Cooper-ibo lendong ajurua aliba rong tem den linük aika sendaktepa lir, ta ashir.

Galaxy Leader hijack asüba mapang iba rong kibur

ya Israel nung shishilembar ka den sendaktepa aliba firm ka liasü aser Japanese shipping line NYK-i amshia lir aser iba rong nung alir nisung 25 ya timba Philippines nungi liasü. Danga rong tem Israel den sendaktepa aliba tejangja mali.

Red Sea nung shishilempaba rong tem amakba aija aser iba ama inyaksangshi tekeraba nung anentsü aser Galaxy Leader

asur yangji ketdangsurtem chioktsü asoshi takhangba agüja US-i pangzüng ka yangluba nung United Nations Security Council ajanga Bodhbarnü vote agitsü lir.

October 7 nü Palestine nung telungpur telok, Hamas-i arütsü alema oa Israel nung nisung 1,139 tepsetba sülen Gaza nung rara ya tenzüker.

Tang tashinung Israel sepaitemi Gaza nung nisung 23,210 tepsetogo.



Israel-i amakdang tepsetba Al-Quds TV journalist Cebr Abu Hedrus kinunger aser külem tenzükerterem noksa nung angur. Israel-Gaza rara nung nisung 24,000 dak tema tepsetba nung osangbener aser media balala nung inyaker nisung 79 tepsetogo, ta January 9, 2024 nü Committee to Protect Journalists (CPJ) sangdong ka nung shia liasü.

Old Jalukie nung volleyball asayamung tenzükogo



Dimapur, Aenjeti/January 10 (TYO): Old Jalukie Village Shifting Day Memorial Volleyball Tournament 2024 Bodhbarnü OSD to Deputy Chief Minister (Planning & National Highway) Azeu Namcyn Hau-i Old Jalukie Village nung tenzüksüogo.

Asayamung lapokba sentong nung o jembiba mapang Azeu Namcyn Hau-i ashiba agi, Old Jalukie yimertem ya parnok dak nungi jakzükba yimtsüng 13 aser jila ka ali kibur lir aser parnok ya kanga mulungso aketba nürurtem lir aser ibayongji parnok litsü nung yimtsüng aika tesunep nung amenokogo.

"Kü atemabo iba asayamung ya asenok puti otsü saisapong

ajanga bilemtetshiba ka lir koba tanga asayamung dang nungi balaka lir," ta Hau-i, Old Jalukie Village tang aliba tesemi 1984 küm belener aoba bilemtetshia jembiba.

Asayamung dak sendakba nung pa tebilemba lemsatepba mapang Hau-i, asayamung ya tetsür aser tebur naprongla kasa asayatsüla ta ashi.

Küm ka nungi küm ka ta asayamung tuluba küma aotsü ta bilemba lemsatepba mapang Hau-i, tarutsü nungbo iba asayamung nung yimtsüng timba aser talisa Jalukie kübok aliba yimtsüng 13 nungi team timbai shilem agitsü imlaba lemastep.

Paisa, asayamung nung shilem agiba team temi tajungtiba

asayatsü imla ataba lemsatep. Hau meina Sinilo Rio, Personal Secretary to Chief Minister, Nagaland aser NDPP Peren Region nungi NDPP Party lenirtem aikati iba sentong nung shilem agia liasü.

Asayamung lapokba sentong ya alakteta jaokeri asayamung wako atsüketsüba sülen tenzük. Sentong ya Paubamleube aser Suiyingaule na lenisüba nung agi aser Jalukie Namgo Baptist Nqua Pastor, Zieroying Hiekha-i sarasada liasü.

Sentong nung Village Council Chairman, Hainkieng Hiekha-i lokti pela agizükba o jembiba aser Adaube Mpom-i achaayanga asayartem tenanzüktepba agia liasü.

ICC Test Player Rankings: Bumrah 4bubai tuogo

New Delhi, Aenjeti/January 10 (Agencies): Bodhbarnü sayaba ICC Men's Test rankings nung India nung bowler Jasprit Bumrah-i (787) külem India nung asayar Ravindra Jadeja ajateta pezübubai tuogo.

South Africa den asayaba mapang kanga junga asaya-a asaya ana nung khen wicket trok aser khen 1 ta agiba sülen Mohammed Siraj-a jenjang 13 tejakdangi tua tang 17buba (661) tongtetogo.

South Africa nung

bowler Lungi Ngidi-a jenjang teku tejakdangi tua tang 28buba nung lir aser Australia team captain Pat Cummins-i Kagiso Rabada ajateta tanabuba tongtetogo. Bowlers' rankings nung Josh Hazlewood-a tenetbuba tongtetogo. Pa England nung asayar James Anderson den kasasa kümogo.

Batter tem rongnung Australia nung batter Marnus Labuschagne pezübubai tuogo aser Steve Smith maneni tasembuba

nung lir. Pakistan nung wicketkeeper, Mohammad Rizwan jenjang 10 tejakdangi tua tang 17buba nung lir. Pai Australia den asayaba mapang asaya ana nung khen 88 aser khen 28 yanglua liasü. Aiden Markram-a top 20-i iogo. Pai Newlands nung Pak den asayaba mapang century ka züka liasü.

India nung batsmen Virat Kohli (775) aser Rohit Sharma (748) na trok aser 10buba nungi masetshi-i lir.



Tir Droupadi Murmu-i Rashtrapati Bhavan, New Delhi nung National Sports and Adventure Awards 2023 sentong agiba mapang cricket asayar Mohammed Shami nem Arjuna Award agütsüba noksa nung angur.

Malaysia Open: Rankireddy-Chirag na 2buba round-i iogo

Aenjeti/January 10, 2023 (Agencies): India nung tarep asayar Satwiksairaj Rankireddy aser Chirag Shetty na tang asaya aliba Malaysia Open Super 1000 badminton tournament nung Bodhbarnü mezüngbuba round asaya koka tanabuba round-i iogo. Ajisiüaka HS Prannoy bo tsükogo.

Satwik aser Chirag nati Indonesia nung tarep Muhammad Shohibul Fikri aser Bagas Maulana na 21-18, 21-19 agi tsükdaksü aser kasa mapang nung Prannoy, Denmark nung asayar Anders Antonsen-i 14-21, 11-21 agi koka liasü.

Satwik aser Chirag na taoba küm nungi kanga junga asaya arudar aser tenati taoba küm Asian Games nung gold, Indonesia nung Super 1000 asayamung ka, Korea Open Super 500 aser Swiss Open super 300 kokogo aser tena ranking nung mapang tatsüka atema No.1 jenjang nung liasü.

Prannoy-ia taoba küm kanga junga asayaogo aser pai World

Championships nung mezüngbuba bronze medal anguba den Asian Games nunga medal angu aser Malaysia Masters super 500 nunga final tonga asaya liasü.

Ajisiüaka Bodhbarnü Malaysia Open mezüngbuba asaya nung pai junga masayateti tsükogo.

Mongolbarnü Kidambi Srikanth-i tesülen nungi atur No. 5 asayar Jonatan Christie 12-21 21-18 21-16 agi kokogo. Tetsür tarep asayar Tanisha Castro aser Ashwini Ponnappa nati America tsür Francesca Corbette aser Allison Lee 21-13 21-16 na koka liasü. Tena taruba asaya Japan tsür Mayu Matsumoto aser Wakana Nagahara na den asayatsü.

Tetsür kija asaya nung Aakarshi Kashyap, 15-21 15-21 agi China tsür Zhang Yi Man-i tsükdaksü. Tebur tarep asayar M R Arjun aser Dhruva Kapila na 16-21 19-21 agi Chinese Taipei nung tarep Fang-Chih Lee aser Fang-Jen Lee nati koka liasü.

Asia Olympic qualifiers: Nancy, Elavenil nati gold & silver angu



Aenjeti/January 10, 2023 (Agencies): Lanur shooter Nancy aser Olympian Elavenil Valarivan nati Bodhbarnü Asia Olympic Qualifiers tetsür 10m air rifle asaya nung gold aser silver medal nguogo.

Nancy shiba junior world team champion lir lai final nung point 252.8 nguteta temaba jenjang nung tembanga liasü.

Kasa mapang nung Elavenil-ia kanga junga asaya ajisiüaka lai point 252.7 dang nguteta tera agi dang gold mangu.

India team-i tetsür 10m air rifle final okshia koker lila, ajisiüaka Mehuli Ghosh-i point 210 dang nguteta la China tsür Shen Yufan sülen pezübuba nung asaya tembanga liasü.

Tebur 10m air rifle final nung India nung world champion marksman Rudranksh Patil-i point 228.7 ngua bronze medal

angu. Iba asaya nung China nung asayar Ma Sihan-i (251.4) gold aser Korea nung asayar Daehan Choe-i silver medal ngua liasü.

Kasa asaya nung India nung Arjun Babuta-a final-i ai saka pa trokbuba nungang tembanga liasü.

Rudranksh-i point 630.4 nguteta tasembuba jenjang nung final-i ai aser Babuta (629.6) pezübuba nung liasü.

Nancy-i final tepeyong kanga junga asaya aser below-par score ka danga maliasü, kasa mapang nung tia maka Elavenil-i 10buba akhaba mapang 9.7 anguba ajanga lai silver dang ngutet.

Qualification round nungbo arishi küm Elavenil (633.8) temaba jenjang nung liasü aser Nancy-i point 632.4 aser Mehuli-i point 631.0 ngua final-i ai.

BILEMDANGANG

"Na madongkosemba tesem nung mapang tintok."